

## FAULA IX.

## LA CIOUSS E LE POULE.

**V**enta nen ambrassè tut-lò ch' fa goi ,  
 E nen mesurè 'l vin mach da la ponga ,  
 Se un veul nen esse pià parei d'i foi ;  
**A**ss perd chi monta an barca su na sponga :  
 E prima d' anfnoujesse ant quaich' affè ,  
 Venta consultè i vej ch' a la san longa.  
**N**a nià d' Galine giovo , da mariè ,  
 Forssa d' sentì vantè 'l marcà , la fera ,  
 Son pignatrasse ant lò d' voreije andè :  
**A** l' han tirà daspart la Masovera ,  
 Pregandla ch' ai buteissa ant un cavagn ,  
 E ch' ai arcapiteisa an quaich manera :  
**D**isendie , ch' lour l' avio già i so agn ,  
 È ch' a vorio nen dventè pì veje  
 Pr vedsse tanti such setà su un scagn.  
**L**a Masovera ai dis pr consoleje ,  
 Ch' a steisso pur sicure , ch' saba ch' ven  
 J' avria portà a Turin pr arcapiteje ;

**Ste Poule sentiend lò , senssa di nen ,**  
 A couro da là Ciouss..... mare arlegreve ,  
 Saba Catlina an porta a vive ben.  
**Oh fie spensierà! cosa penseve :**  
 Apena arrivà-là, v' sautran a col  
 Sinquanta cusinè pr palpegieve ;  
**Toucand pr drit , pr stort e 'l dur , e 'l mol ,**  
 E voi chi sè pitost li polpassue  
 A risigo sul coulp d' tajeve 'l col!  
**Av piumran tute , e bele patanue**  
 Av casso ant na marmita , av fan rusti ,  
 E voi mie povre done i sè forslue!  
**Ala sità le gent , l' è nen-'l-di ,**  
 A son così galup d' mangè d' carnassa ,  
 Ch' a treuvo 'l bon , e 'l gram tut savuri.  
**La povra vaca-grisa..... cla mairassa ,**  
 Ch' i luv sario pignanch andaje antourn ,  
 A l' Ospidal han dit , ch' a l' era grassa !  
**Guardè!..... mi stessa , mi l' avria pour ,**  
 Quantunque i' sia na Ciouss veja stransia ,  
 Che là quaich sur Economo Inspetour  
**Am feissa con tut-lò passè pr fia.**